



# Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 8

Yangia anidakangma :

Tir Yimiyim

tiryimiyim@aolima

tir yimiyim

TAPAK 7

Australia PM-i lockdown bukuma jemb

Mehbooba Mufti-i J&K atema state jenjang meshir



VOL. XVIII NO. 310 (ADOK 310) DIMAPUR

TENTONÜ (MONDAY)

LUROI (AUGUST) 23, 2021

₹ 5.00

## CPN-i nisung ka tuteta tenung menüksüba magizüker: DALT

**Dimapur, Augsut 22, 2021 (TYO):** Concerned People of Nagaland (CPN)-i Nagaland Governor dangi shidi ka züluba nung asür Chief Secretary tuteta tenung menükja züluba atema Dimapur Ao Lanur Telongjem (DALT)-i ashishiteper.

"Nagaland nung ochimashi aser ozüing alema inyakba maparen anema CPN-i mapa tajung inyaka arur saka asür Chief Secretary ka tenung amshia tenung menüksüba mebilemdangi inyakba mapa ka lir. Asür Chief Secretary ka tenung amshiba ajanga ozüing timi benshitsu aser temeten angutsü ta südi süra, tarutsü nunga iba kasa mapa inyaksüla. Ajsüüka, temolung masüba onüktem jembidang aser temelenshi tajung bener arutsü atema inyakdang nisung ka tuteta tenung menüksüba tangatetba ya malitsüla kechiyong office ajak ozüing kübok lir" ta DALT Tir Aotemsu Aier aser Tongti Tezulur Pangertoshi nati sangdong ka nung ashi.

Chief Secretary inyaker kaji Cabinet Secretary lir aser iba ketdangsür jagi State Cabinet telemetba aser tetuyuba sülen anidaker. Anungji kechi telemetba agidir agiaka ibaji sorkari agiba lir, ta DALT-isa metetdaksü.

Tasür ka tenung menüksüba Naga nung sobaliba aser inyakyim alema lir ta Kohima Ao Officers' Union (KAOT)-i kanga dang shitak shiogo. Anungji asenoki ochi aser temeten atema inyakdang, temolung nung tebilemba tamajung yur meinyaksüla, ta DALT-isa ashi.

Talisa, Nagaland nung tang teinyakdak Director General of Police (DGP) indang kümsük atsülangba dak sendakba maparenji Ministry of Home Affairs (MHA) ajanga inyaker, ta DALT-isa metetdaksüogo.

DALT-i ochi, telongjem aser temeten atema inyaker anungji ozüing nung ajemdaker Naga loktiliba yimjung nung tejakleni anir aotsü atema kasa tangatetba alirtem den külemi inyaksü, ta mendenpurtemisa ashi.

## Covid wara nung Railways-i Rs 36,000 crore akoksa

**Jalna, August 22, 2021 (Agencies):** Covid-19 wara mapang Indian Railways-i Rs 36,000 crore akoksaogo ta Union minister Raosaheb Danve-i Deobarnü ashi.

Indian Railways atema sen timtiba aazükba kji khu abenba train tem ajanga lir ta pai ashi.

"Passenger train segment ajanga teti takoksa ajurur. Ticket jenjang atuba ajanga passenger tem dang kongshir aser iba jagi jenjang matur. Covid wara mapang Railways-i Rs 36,000

crore tashi akoksa" ta pai metetdaksü.

"Khu abenba train tem ajanga dang sen aazük. Wara mapang khu abenba train tem ajanga khu balala abenba aser nüborrem yariba nung tongtipang shilem agiogo" ta Union minister Danve-isa ashi.

Minister of State for Railways Danve-i tanü Jalna railway station nung underbridge ka yanglutsü atema lung azüingtsüdang iba osang metetdaksü.

## Manipur Governor inyaksü atema La Ganesan shim



La Ganesan

inyaksü atema La Ganesan shimba molunga agizük.

August 20, 2021 nü taoba Manipur Governor Najma Heptulla-i kümsük tonger mapa nungi anenba sülen anogo ana lir la melenzüksü atema La Ganesan shimogo.

Ganesan ya taoba Rajya Sabha MP ka lir aser BJP nung mapa balala inyakogo.

La Ganesan-isa Rashtriya Swayamsevak Sangh (RSS) nung Pracharak ka ama inyaka liasü.

Ganesan-i Manipur Governor inyaksü shimer ta Deobarnü Rashtrapati Bhavan-i sangdong ka nung metetdaksü.

Tang Sikkim Governor Ganga Prasad-i Manipur Governor repsema inyaker.

## Mkg police-i motorcycle auyar 3 apu

**Mkg, August 22 (TYO):** Mokokchung police-i motorcycle auyar nisung asem puogo aser parnokki auyaba motorcycle 6 ngutetoga ta tanü sangdong ka nung Mokokchung SPWb. Vishal-i metetdaksüogo.

Aurtemji Zunheboto district kübok Keltomi nung Kakito Yeptho, Inapu Kiba aser Hito

Awomi nungertem liasü. Item auertem ket nungi Mokokchung police-i ngutetba motor cycle-temji Yamaha R15, Pulsar RS 200, KTM Duke, TVS Apache RTR 200, Pulsar 150 DTS-1 aser Discover 125 liasü. Item motorcycle-temji kar Zunheboto nungi aser kar Tuensang nungi ngutet ta paisa ashi.

## Afghanistan nung sorkar tasen ka yakta akümtsü: Taliban

**Kabul/New Delhi, August 22, 2021 (Agencies):** Afghanistan nung sorkar tasen ka akümtsü atema Afghan yimtenren lennirtem den jembitepdar ta Taliban spokesman Zabihullah Mujahid-i Deobarnü metetdaksüogo.

"Ozü yimtenren lennirtemi Kabul nung yimsüsürtem den ajurutepa jembidar. Kobi meli sorkar tasen ka kümtetba osang angashitsü" ta Mujahid-i ashi.

Honibarnü Taliban indang political office züingsemtemi Kabul nung taoba president Hamid Karzai aser High Council for National Reconciliation (HCNR) mendenbuba Abdullah Abdullah na den ajurutepa liasü. Iba mapang parnokki telok ajak adenba sorkar ka akümtsü atema jembitep.

Honibarnü Kabul-i aruba Taliban indang political office züingsemtemji Shahabuddin Delawar, Abdul Salam Hanafi, Mullah Khairullah Khairkhaw aser Abdul Rahmand Fida

nunger lir. Abdullah Abdullah-i Facebook nung Taliban lennirtem den yimtenren mapa aser ajak adenba sorkar ka akümtsü atema jembioogo ta shia liasü.

Ajsüüka, Afghan yimtenren lennir karibo tang olemtepa aitsür aser iba nung ajak adentsüla ta ashir.

"Tang inyakba mapa ya majung kechiyong iba ya nisung kar tenung tajung angutsü atema dang inyakba ama lir aser Afghan nung akhümtsübuba mesayur" ta Nahzat-e-Hambastagi Afghanistan party mendenbuba Sayed Eshaq Gailani-i ashi.

"Taruba sorkar nung ajak mendenra magizüksü" ta Balkh nung taoba governor Atta Mohammad Noor-ia metetdaksüogo.

"Rara ano metembang lir, talangka aotsü, onoki parnok (Taliban) tendangtsü. Ajak adenba sorkar ka akümtsü mesüra raratsü atema onok shia

arutsü" ta Noor-isa ashi.

Pakistan foreign minister Shah Mahmood Qureshi-i Russia foreign minister den phone ajanga Afghanistan atema jembioogo.

Iba mapang tenaprongi Afghan nung ajak atema noktakba aser telok ajak adenba sorkar ka kümtettsü nungdak ta jembia liasü.

Taliban-i Afghanistan yimtiba atsünga agiba sülen linük aikati Kabul airport nungi pei pei sensotem anir aoer aser testüba anogo 7 tsüingda Kabul airport aser temeket nung nisung 20 shi süogo, ta Deobarnü NATO ketdangsür kati ashi.

Taliban-i linük atsünga agiba atema tetsüba nung linük toktsür aotsü merangba Afghan civilian tenet tashi Kabul international airport anasa khaset, ta British Army-ia ashi.

Deobarnü India-i Kabul nungi India nung 107 dena nisung ajak agi 168 tashi IAF transport aircraft ka nung anir aruogo.

## COVID-19 Nagaland: 35 dak putet, 52 taneptsü angu & 1 asü

**Kohima, August 22, 2021 (TYO):** Deobarnü Nagaland nung COVID-19 puteta alir nisung 52 taneptsü angu aser 35 dak putet.

"Tesüiba ghonda 24 tsüingda COVID-19 puteta alir nisung 52 tashi taneptsü angu. Parnokki Dimapur nung 26, Kohima nung 12, Mokokchung nung 8, Longleng nung 4 aser Peren nung 2 lir" ta Integrated Disease Surveillance Project atema State Nodal Officer, Dr Nyanthung Kikon-i ashi.

Parnok züingsema taneptsü angur ajak agi nisung 27,151 kümogo aser ibaji 91.76% lir, ta paisa ashi.

"Deobarnü nisung 35 dak COVID-19 putet. Parnokki

Dimapur nung 12, Kohima o Mokokchung nung terer (10) aser Kiphire, Mon o Phek nung kaka (1) lir. parnok züingsema nisung ajak agi 29,589 kümogo" ta Dr Kikon-isa ashi.

Tang Nagaland nung nisung 975 anepaludar. Tanü Dimapur nung COVID-19 puteta alir ka asü aser iba nisung züingsema tasür ajak agi 610 kümogo, ta paisa shisem.

"Tang tashi nung COVID-19 alitsü akok ta temlolung melemba sample 301,446 tendangogo. RT-PCR ajanga 105,677, TrueNat ajanga 73,157 aser Rapid Antigen Test ajanga 122,612 tendang" ta Dr Kikon-isa metetdaksü.

"Honibar tashi nung Nagaland nung nisung 646,084 nem COVID-19 vaccine indang dose 828,063 agütsüogo" ta State Immunization Officer, Dr Ritu Thurr-ia ashi.

Vaccine agirtemji frontline workers 60,846, healthcare workers 15,989, arishi küm 45 ser temapur 190,749 aser arishi küm 18 nungi 44 tsüingda alir 378,500 lir, ta paisa ashi.

Vaccine agirtem rongnung nisung 180,290-i dose anaprong agiogo. Parnokki frontline workers 43,062, healthcare workers 12,831, arishi küm 45 ser temapur 110,743 aser arishi küm 18 nungi 44 tsüingda alir 13,654 lir, ta Dr Thurr-isa ashi.

## ATSUM-i Manipur hill district ajak mokdanger

**Imphal, August 22, 2021 (Agencies):** All Tribal Students Union of Manipur (ATSUM)-i Deobar ayaterm nungi Hombar ayaterm tashi hill district ajak nung ghonda 24 lungkak aittsü ayongogo.

Tanga tagidak Manipur Legislative Assembly indang monsoon session nung Manipur (Hills Area) Autonomous District Councils Bill 2021 mebenokba atema tejashi nung ATSUM-i lungkak aittsü ayongzük. Manipur nung monsoon session ya August 24 nü tembangtsü.

Hill Areas Committee (HAC)-i Manipur (Hill Areas) Autonomous District Council Bill, 2021 yanglur state sorkar nem agütsü aser iba ya Manipur Legislative Assembly nung Act ka

ama agizüksü ashi.

"Lisopurtem ajangzüksü atema renemba bill agizüksü sorkari memolungba atema sasa bilemer" ta ATSUM General Secretary, SR Andria-i ashi.

"Manipur Assembly-i iba bill agizükra aser Act ka ama kümdaktsüra, hill district tem nung terenlok tulu bentsür arutsü" ta anogo asem tejakdang Hill Areas Committee züingsem TN Haokip-i shia liasü.

ATSUM-i hill district ajak mokdangtsü ayongba nung All Manipur Tribal Union-ia pusema nungitba osang metetdaksüogo.

"Iba Bill ya Arlla 371 nung la teta aliba amalir sakastatesorkari ibayalendenlenalirtempusemakin o kin indang onük ka ama kümdaktsü" ta AMTU Information

and Publicity wing-i ashi.

"ATSUM-i mokdangtsü ayongba nung hill village headman, chairman, chief ajaki nüboagüja akokba tashi yariteptsü mepishir" ta AMTU-isa metetdaksü.

State sorkari tesüba küm 50 tashi Manipur Tribal nisungtem mezüingmeshia arur aser senzüka yutsür, ta ATSUM-i metetdaksü.

"State sorkari mapang shia lendenlen aliba teloktem den yaritepa Indian parliament nung Arlla 371C agientsü atema ola adokogo. Iba ajanga Manipur Tribal nisungtemi temzüing nung aliba temetentem mangutsü ama ajiteter. Onokia constitution nung aliba meteta lir" ta kakatshir telokisa ashi.

# HCMC & VHC Chümoukedima ajanga pelaba lemsateper



NHP team den HCMC züngsem aser PHC, Chümoukedima nung staff tangokba noksa ka yangi angur.

**Dimapur, Luroi/August 22 (TYO):** Department of Health & Family Welfare, Government of Nagaland kübok Nagaland Health Project (NHP) takok ngua inyakba atema Health Centre Management Committee (HCMC), PHC Chümoukedima aser Village

# Pangnyu Phom-i Union Minister Sonowal ajuru

**Dimapur, Luroi/August 22 (TYO):** Minister, Health & Family Welfare & AYUSH, S. Pangnyu Phom ajanga August 20, 2021 nü New Delhi nung Union Minister for Ports, Shipping & Waterways and AYUSH, Sarbanada Sonowal den ajurutepa liasü. Iba mapang Pangnyu ajanga

# Wokha nung mürekmejuba aser süngdong atemba sentong ka agi

**Dimapur, Luroi/August 22 (TYO):** Wokha Circle Students' Union (WCSU) kübok aliba unit ajak aser Wokha Town Council lungjemer Tsumang Lake nung mürekmejuba aser süngdong atemba sentong ka August 21, 2021 nü ayongzüka liasü. Iba sentong ya "Let's Keep Tsumang Lake Clean" omen nung ajemdaker agia liasü. Iba sentong nung ADC &

# Security Forces ajanga Nikki Sumi telok nungi züngsem ka apu



**Dimapur, Luroi/August 22 (TYO):** Osang tejangja kar nung ajemdaker Security Forces ajanga State Police den lungjemer general area Thahekhu, Dimapur nung August 20, 2021 nü operation ka agiba mapang NSCN-K (Nikki

program ajanga health committee temi mera balala agütsü maongka agütsür, ta ashi.

Project dak keta aliba senotsü kanga kumdanga lemsaba ajanga Health Centres aser Health Committees temi timtem majurui senotsü ketdang süteter. NHP ajanga COVID-19 pandemic mapang teyari agütsüba ajanga Village Health Committee kanga ajanzükogo, kechiaser NHP-i nüburttem nem shisa agütsüba sentong balala ayongzüka agia liasü.

NHP ajanga senotsü teyari agütsüba sülen PHC, Chümoukedima kanga renlokogo, talisa ki-o-jen, osettsüset aser mozü tsütsü renloka aoba angur.

COVID-19 tashidak wara asoshia NHP kübok tang aliba scheme tem ajanga PHC inyakyim tuluka ajanzükogo.

NHP Civil mapa kübok PHC nung ki-o-jen yanglushiba maparen balala inyakogo, aser item rongnung tzü agütsüba, arütsü atsüba aser entrance gate tem renemogo, ta ashi.

state nung AYUSH scheme aser AYUSH Department indang inyakyim lemsatepa liasü aser State nung AYUSH Hospital ajanga yimdakyimtsüng tashinung nüburttem ajanzükütsü, ta shia liasü.

Paisa state nung AYUSH scheme/project balala inyaktsüba atema centre dang pelaba lemsatepa liasü. State nung AYUSH kübok scheme balala tajungtiba nung inyakba angashia pelar aser Ministry of AYUSH ajanga Nagaland aser Northeast state tem nung project balala tembanga inyaktsü atema akok tashi yaritsü, ta Union Minister, Sonowal-i ashi.

Administrator, Wokha Town Council, T. Lankonsen Tsanglao aser par telokia shilem agia WCSU den yaritepa liasü.

Sentong nung Tsanglao-i o tatsüka jembuba mapang Wokha Town müreka ayutsü atema akokba lenmang nung yariteptsü ashi aser kaketshitem dang iba ama maparen ya tarutsü anogotem nung mapa tuluba inyaktsü asoshi mera ka

Iba sentong nung parnoki naro aser tebour jungdaksüba süngjangdong tema liasü aser ayi müreka jana bendena liasü.

Parnokisa signboard ka asong aser nüburttem dang awatsüng müreka aser tebour junga ayutsü ajungshia liasü.

Sumi) telok nungi züngsem ka injang ana nguteta liasü.

Iba dak sendakba ken o maneni bushisüngdangtsü atema pua alisang den pa ket nungi ngutetba osettem ya Sub Urban Police Station, Dimapur nem amoktsüogogo, ta sangdong ajanga ashi.

# Lizo Model village nung arem shiti-i ki-o-jen raksatsü



**Dimapur, Luroi/August 22 (TYO):** Mokokchung district nung Longchem Sub-Division kübok Lizo Model village nung August 21, 2021 anepbong 1:00 ako meta arem shiti adoka ki-io-jen aser tzülü kanga mejungi raksatsü, ta osang ka ajanga ashi.

Mapang shia arem shiti adoka yimtsüng nung aliba nüburttem nem mepetmesü timtem agütsüba kisüng masü saka rongsen tsütsü takoksa tulu aludaktsür.

Iba ama timtem ajuruba mapang sorkar tsütsü nungi tim lenmang nung teyari agütsütsü nüburttem teimla tulu nung lir aser yamaji nüburttem teimla mesamadaktsüi sorkari yaritsüla, ta timtem ajurua aliba yimtsüng nüburttemi ashi.

# Temsumongba Ozukum-i atenba ken ka sayaogo



**Dimapur, Luroi/August 22 (TYO):** Temsumongba Ozukum-i atenba "LIJABA" ken ka August 18, 2021 nü sayaogo. Iba ken ya Asso. Pastor Youth, East Dimapur Ao Baptist Arogo ajanga sarasadema sayatsü.

Temsumongba Ozukum ya Dimapur nungi 'Folk Fusion' kentener ka lir. Pai ken zülur aser mejema atener. Tang tashinung pai kensem Vol. 3 tashi adoka lir aser pai Ao oshi nung timba folk fusion ken audio aser video yanglua YouTube nung saya lir. Temsumongba Ozukum-i 2017 aser 2019 küm Music Award of Nagaland nung Best Gospel Local Dialect sempet ngua lir.

# Dept. of Social Welfare indang office tasen semzüktsü

**Dimapur, Luroi/August 22 (TYO):** Department of Social Welfare indang directorate office building tasenba ya NBCC Convention Center (Phezoucha), Kohima tesülen August 24, 2021 anüngdang 12:00 ako nung semzüktsü, ta sangdong ka ajanga ashi.

Iba sentong nung Advisor, Social Welfare, Home Guards & Civil Defence, Noke Wangnao ya tetushi tesemdanger ka ama arua adentsü, kong Jt. Director, Social Welfare, Tosheli Zhimomi menden alitsü.

Advisor, Noke Wangnao-i iba ki semzüktsütsü aser General Secretary, NBCC, Rev. Dr. Zelhou Keyho ajanga ki meshiteta sarasademtsütsü. Sentong nung Director, Social Welfare, K. Atoli Sema ajanga tayongzüka o jembitsü aser E.E, Social Welfare, K. John Mera ajanga ki yangluba indang osang abentsü. Iba sentong nung Commissioner & Secretary, Social Welfare, Sarah R. Ritse ajanga o tatsüka jembitsü aser Officer on Special Duty, Social Welfare, Michael Zaren ajanga melepzüng o jembitsü.

## Kokrajhar nung police-i nisung 3 khaset



Kokrajhar nung Special DGP LR Bishnoi, Kokrajhar SP Prateek Thube aser tanga police ketdangsürtemi osangbener dang prangpong-injangtem den tanga osettem apuba sayudang agiba noksa angur.

**Guwahati, August 22, 2021**

**(Agencies):** Assam nung meimlaba mapang nisung tamajungtemi mapa inyakba azüoktsü atema police-i prangpong-injang amshitsüsa akümer.

Iba ama maparen dak sendakba nung Deobarnü Assam Police-i temolung melemi bilemba nisung asem khasetogo.

Assam nung police-i auer asütsü akok ta temolung melemi bilemba nisung asem khaset. Iba lendong ya Deobarnü Kokrajhar district nung atalok.

Iba district nung Allahabad

Bank indang kongsang ka nung par asem yagi sen auyatsü merangba mapang police-i par asempronlga khaset.

Parnoki tama injang khaloktsüba sülen onokia injang khaloktsüdang par asempronlga khaset, ta police-i ashi.

"Bank nung sen auyatsü merangba maparen putetba mapang parnokki police dak injang khaloktsü. Police-ia telangzüba agüja injang yokba mapang par asempronlga kanga mejungi yiru aser mapang tatsüka dang lir par asempronlga asü" ta Assam

DGP Bhaskar Jyoti Mahanta-i ashi. "Parnok ket nungi gari, hadirtem, gas cutters, pistol ana den Oxygen Cylinder tem ngutetogo" ta Assam DGP-isa shisem. Par asem densema May 10, 2021 nungi Assam police-i oziung alema inyaker nisung 20 shi khasetogo. May 10 nungi August 22, 2021 tsüngda nisung 30 dak tema injang agi yirua liasü. Parnoki police dang nungi ajentsü merangba ajanga injang khaloktsütsüsa akümer, ta Assam Police-i metetdaktüsügo.

## Manipur nung 7th Pay Commission meshia lungkak aiter

**Imphal, August 22, 2021**

**(Agencies):** Manipur Secretariat nung inyakerkem densema Manipur state sorkar mapa inyakerteri August 17, 2021 nungi lungkak aiter.

Parnoki state sorkar dang 7th Central Pay Commission mapa tenzüktsü takhangba agüja lungkak aiter.

"MoU aika nung sign sütepaka, tanü tashi nung mapa ka danga meinyaker" ta Manipur Secretariat Services Association-i metetdaktüsü.

Iba lungkak aitba sentong ya

Nurses, Medical doctors aser Engineers dena Manipur Government Services' Federation-i külemi ayonga agir.

"State sorkari ketdangsübaren inyakyim memeteti aser tebilemstü khuret mebeni mapa inyaker. Parnoki nübortem, sorkar mapa inyakerkem aser tesayurtem atema mebilemstür" ta parnokki ashi.

"Manipur sorkar mapa inyakerkem aser pensioner tem nem 7th Central Pay Commission agütsütsü ni

takhangba agütsür" ta Manipur Legislative Assembly nung opposition tongtiba Manipur Congress Spokesman Ningombam Bupenda Meitei-ia metetdaktüsügo.

"Ni Chief Minister, GAD Minister aser Finance Minister dang state sorkar mapa inyakerkem aser pensioner tem nem DA (Dearness Allowance) & DR (Dearness Relief) 7% agütsüba melena 28% agütsütsü ayongzüker" ta Ningombam Bupenda Meitei-isa ashi.



August 21, 2021 aonung Tinsukia district nung aliba Jagun Market nung kitsükkirong lendong ka atalokdang Spear Corps kübok Red Shield Division sepaitemi yaritep. Shishilembadak mi lendong atalok aser dokantem nung mi kaoloka aodang Army firefighting team-i ghonda ka shi agia miji remsepteta liasü.

## TPCC president Biswas-i shidi meyipa agi

**Agartala, August 22, 2021**

**(Agencies):** Tripura Pradesh Congress president Piyush Biswas-i Honibarnü menden nungi anenba shidi agütsüba sülen ghonda ishika lir tanaben iba shidi meyipa agiogo.

Tripura Congress president Biswas-i Facebook post ka nung state nung party lennirtemi meyariba atema president nungi anenba shidi agütsü ta metetdaktüsü.

"Ni TPCC President (acting) inyakdang yariteper Congress lennir aser züngsem ajak dang pelaba metetdaktüsür. Tanü ni President mapa nungi anener aser politics nungi anisüngzüker" ta pai zülü.

"Congress President Sonia Gandhi aser Rahul Gandhi nati ni yariba atema pelaba

shisemer. Ni kü mapa tejenba dangi aoer" ta Biswas-isa ashi.

Ajisüaka, ghonda ishika lir Tripura atema party in-charge-i pa den jembiogo aser state nung tebilemstü khuret ajuruba ajak atema jembitsü nangzüker ta pai ashi.

"Pai tebilemstü khurettem koktetra, kü indang khuret kecha mali" ta Biswas-isa shisem.

All India Mahila Congress president aser taoba Silchar MP Sushmita Dev-i Congress nungi anener Trinamool Congress nung adenba sülen anogo ishika lir Biswas-i iba osang sangokja liasü.

Agartala nung Congress lennir kari pa nem tetsükdaktüsü agütsü aser amalitep makar ta ni yariba atema pelaba Biswas-i tai tongloktüsü.

## Manipur nung AR-i PLA telungpur ka apu



**Imphal, August 22, 2021**

**(Agencies):** Manipur nungi sepaitemi PLA (People's Liberation Army) telungpur ka puogo.

Manipur kübok Tegnoupal district nungi Assam Rifles indang telok kati PLA züngsemji apu.

Osang tejangja angazükba sülen Tegnoupal Battalion - Assam Rifles-i iba tesem mita aodang telungpurji apu.

AR-i PLA telungpurji police ket nung agütsügo aser maneni bushisüngdangtsü.

August ita tetenzüklen Myanmar nung mitkar yimsüsüba anema rara adokba ajanga People's Liberation Army (PLA) telungpur trok shi

taküm samaogo.

Myanmar nung NSCN-KYA indang Nayang Wakathan camp nung lendong ataloka liasü. Iba camp ya Changlang district, Arunachal Pradesh kübok Pangsau Pass anasa lir.

Myanmar nung 'Junta'-i Manipur nungi PLA densema Northeast nungi telungpur telok balala dang ka küma longjemer linük nung military yimsüsüba anema raratsü asoshi ajungshia arudar.

Ibayongji, Northeast nungi telungpur tsüngda kanga tezütangteper/jashiseter aser aikati mapa tamajung toktsür tamai adoktsü asoshi asadangdar.

## Mizoram-i Assam police anema ken o benok

**Aizawl, August 22, 2021**

**(Agencies):** Ki yangludang amshiba osettsüsettem auya ama temolung melemi bilemba atema Mizoram kübok Bairabi police station nung Assam police anema ken o ka benokogo.

Assam Police-i ki yangludang amshiba osettsüsettem auyaba osang ya Kolasib deputy commissioner-i Assam nung Hailakandi deputy commissioner dang shidi ka ajanga metetdaktüsü.

"August 20, 2021 anüngdang 12:00 meta duty nung nokdaker Assam police-i Zophai, Bairabi (Mizoram) telungi ait. Iba nung Mizoram indang mezüng Chief

Minister Pu Ch Chhunga indang tzülü den lenmang sendakteptsü atema apu teyangludak lir" ta shidi nung shia lir.

"Iba tesem nung Assam Police-i mapa inyakerkem nem timtem agütsü aser merang rod densema ki yangludang amshiba osettsüset kar auya" ta shidi nungsa zülüa lir.

"Ki yangludang amshiba osettsüset auyaba atema Assam Police anema Bairabi police station nung ken o ka benokogo" ta Kolasib deputy commissioner-isa metetdaktüsü.

Kasa mapang, Kolasib DC-i Hailakandi DC dang iba tatalokba ya arrtsü ken o ka ama magitsü asoshi mepishio.



## TIR YIMYIM YIMOBILEM (EDITORIAL)

DIMAPUR TENTONÜ, LUROI(AUGUST) 23, 2021

### Afghanistan nungi angazükdi

**A**fghanistan lima nung pei nübertem kodamasü tetsübu tia nung yutsür tir jena ao, terenlok mapatem ajak anen, government mali aküm aser shingai shinga dak temulung melemtetter ta aliba tensa tia indang bilemdanga alidang Whatsapp telok ka nung "Afghanistan nungi tangazüksü" ta aser shibai zülubaer tenüng mali ser osang ka aru aser yangji yamai zülua liasü- "Nai taküm nung kanga aginüa aliba ki ka sütet, gari ka alitet aser bank nung sen jenti ayu, saka nür linük nung nür yimten akanga melira item ajakji auyi akümtsü; nür lima nung nür yimten indang rongsen kecha makai kümra nü rongsenji kecha jenjang makaba rongsen akümtsü; nü lima nung nür yimten lenirtemi na yokadoker jena oadokra, na minute ishika nung talidak maka 'refugee' akümtsü. Anungji, nür lima yanglutsüba nung temulung agüjang, ochi nung akanga nokdakba lenir shimang, nü vote sen dalang yong yokadoker timtemtsü agibo na timtem mapang yaritettsüa lenir shimang. Nür limaji nür kibong lir ta bilemang, iba kibong nungji na sayutsü aser yaritsü asoshi tebu ka nungdaker. Election mapang nungang nü dangi nü sen agi aliba sempet bener arutsür lenirtemji teshim." Item orentem ya kodang tang Afghanistan nung atalokba aser asen lima nung asenoki beshiba mapatem den medemdangdir, atangji, asenoka tang Afghanistan nung atalokba amaji matalokdang tansütsü aser temulung atangtsü tangazüksü mapa aika lir. Afghanistan nung Taliban teloki yimsüsüa aliba atsüngdoker US government-i yaria taoba küm 20 tashi Afghanistan lima nung Afghan nung züngashia metetba yimten yimsüsürtem nem yimsü südaktsü. Iba mapang US nungertemi anir North Atlantic Treaty Organization (NATO)linüktem nungi sepaitem yoka nübo agidang masü saka rongsen jenti endoka sepaitem nem training aser ita sen tashi agüja yaria aruogo. Iba mapangbo Afghanistan lima nung tesünep yimjung mapang arunungji, India dena alima aikati Afghanistan nung oagi sen aika jenjang terenlok mapatem tenzüka inyaka liasü. Ajisüaka, Afghanistan nungertem asoshi tia majung kaji, tangar kintemi yamaji rongsen aser nübo endoka par lima tarutsü jenjang tajungba ka kuma yanglutsütsü merangdang, Afghan yimsüsür aser lenirtemi parnok government tashi aittsü aser nübertem parnok dak temulung alemtsüa ochishia temeim agi parnok anepalu masü saka pei asoshi dang ali rongsen bendentsü tenzüka. Afghan lenirtemi Afghan government takar kumdaktsütsü merang masü saka parnokang takar akümtsü merang. Ibayongji, parnoki kanga aginüa pongmanga aliba ki asangsang nung yanglutet, gari alitet, bank nung sen aka rezünga yutet aser küm 20 tsüngda parnok yimsüsür masü takar aküm. Afghan nungertemia pei lima aser nübertem kümzüka yutettsüa nübo tetemsü tajung ka shim masü saka rongsen meimba nisungang ka parnok lenir asütsü shim, anungji kodang US sepaitem pei limai meyipa aotsü tenzüka aser Taliban Kabul yimti tonga aru, par lima aser par nübertem toktsür sen-ang pai bentetba tashi oshia bener jena ao aser tangar lima nung jenok. Iba tiaji kodang asenok tia den medemdangdir, asenoka tensa mapang tamajung ajuru nungbo Afghan lenir amaji asenoka lenirtema pei lima aser nübertem toktsür jena oa adoktsü asü ta bilemer. Afghan nung yimten yimsüsür, government nung tongti ketdangser aser sepai tanishirtem meyong ki aika auyi kümogo aser aika toktsür jenogo. Tangbo joko Afghanistan nung chuba ki ama yanglua akaba nung talir mali, jenjang makaba rongsen kümogo. Pei yimten yimsüsürtemi toktsür ajen nungji, pei kidanga tetsübu agi tali majung aser tangalen tejenokdak maka, Afghan nung senso aika talidak maka nemzünemponger amai kümogo. Asenoka tang karaa memelenshira aser temulung meyipa pei lima yanglushitsü metenzükra, yakta government mali ama kumadoktsü aser asen lima nung nisung ajak pei sünütsü asütsü. Aji oda, government mali aser ozüng raksar onsara nungji tanü pei ki chuba ki ama yanglubatem nung ya talir malitsü. Tensa onsara majung nungji mapa kecha meinyaktettsü, anungji asenok jenadoktsü aser talidak maka nemzüksü. Ajisüaka, yimsüsür aser lenirtembo bendanglen yimti balala nung yanglua aliba kidang oagi jenoktsü aser parnok asoshiho iba ama tensa mapangji kazüa senzüba (holiday) mapangang ka asütsü. Iba ama tensa ka asenok ajaki ajurutsüa asenoki tanü meteta aser memeteti yangludagi. Afghanistan nung tang Afghan lenirtem aser nübertem ajuruba tia ya ajungbena meimlaba mapa ka ataloker masü saka parnoki taoba küm 20 nung ochimashi, morumoru aser nübertem memeim inyakba mapatem meyipa angur. Asenok tia ajung, asenokbo melenshitsüa tangar lima nung ataloka sayur. Ibaji asenok asoshi taochi mapang lir, anungji pi dak atalokba nungi asenoka tan ser tajung kümdi.

## OLEMSABANG

### Arogo-i aser Laishiri yamai clean election nung shilem agidaktsüner

Ms. Esther (Osang zülur)

(Yashi adok nungi...)

Asen lokti joko sen dak dang ranglokba lokti aser senji dang ajak aser tsüngrem tulutiba kumdaktsüogo. Ochishir, tangateter, shia meteter, nübur meimba nübu talang aser tetemsü süaka pa/la sen maliji madoktsü ta asenoki jembi tashi nung kodanga nisung tetemsü shingai temulung ulua electioni maitsü. 'Everything is politics but politics is not everything' ta teti jembi. Anungji iba principle nung ajemdaker shinga anema masü, shinga tsütsü masü saka nübur ajungtsüasoshi Arogoi anir Election merüka agiba nung tongti shilem agitsü tangatetba lidaktsüner aser iba ajanga dang Clean election bener arutettsü. Lai nung Theological Perspectives on economics-ji tejangja angutsü. Tat. agi., Manna economy (Mat.6:25-34), theology of contentment (Phil.4:11; Heb.13:5); Love of money as the root of all evil (I Tim.6:10). Iba mesükba nungi Laishirtemi tamangertem nem tangatetba agütsüdaktsüner.

Naga nung candidatestemi election nung sen indokba indang Kohima based organization YouthNet-i parnok post-election study ajanga yamai ngutet: Rs. 570 crore (2008 Assembly election), Rs 938 crore (2013 Assembly election), Rs 1061 crore (2018 Assembly election). Election Commission report nung zülua aliba agi Nagaland State Assembly election 2018 nung total votes 9,96,170 agütsü, anungji vote ka jenjangji approximately Rs 10,650 atoker. India lima nung election sen indokba aser vote ratio bushidangra Nagalandji teimtiba asütsü südi.

Clean election magitettsüa nokdangba factorji senso/identity politics or self-centered politics lir. Asenok Naga nung-er clan/village candidate nominate asüba aser yim bangdak tashi amshia yimer vote ajak iba candidate nem agütsüba ajanga democracy tamendakdak (foundation) raksatsür aser linük/nübur meimba lenisüba madoker. Saka Naga nungertemi senso/identity basis nung dang aiben asen representative shimtsü meranger aser yamaji kinunger, kidong, yimer, tsükong, tribe yamala mesükba nung shimer.

Naga lima nung Election merüka agitsü atema item teraksa inyakyim - Sen aser Senso - anaji indoktsü ajaki bangjema mulungtetsüla. Nisung ka-anati clean election agenda nung contest asütsü merangba ajanga Naga election culture memelenshitsü. Temelenshi bener arutsü atema nüburtem mindset melenshitsü nungdak aser arok 'social consensus' ajanga temerük inyakyim akanga renemtsüla. Iba temelenshi bener aruba nung Arogo aser Laishiri mapa tulu aser tongtipang inyaktsü lir.

Mizoram nung clean election maparen takok ngua inyaka aruba indang kodang repringdangdir, Mizoram nung Clean Election takok anguba otsü asenok ajaki meteta lir. Mizoram nung 2008 Assembly polls nungi tenzüka tanü tashi Mizo Arogo aser Laishir lenisüba nung clean election agia arudagi.

Rev. Lalbiakmawia, Mizo People's Forum Mendenbuba, pai Mizoram clean election genesis indang media interview ka nung yamai ashiba agi onoki 2008 Assembly Election temulungjang nung yur 2006 küm The Mizo People's Forum tenzüka aser onoki nüburtem shirnokisa Mizoram nung yimjung maneni lidaktsüneritem nisungtem aser parnok teyaritepi bushia inyaka liasü. Aser Political Party-temi aser nüburtemi ibaji angateta yang nungi temelenshi ka arutsü ta pela agizük.

Mizoram election nung sen (money) aser tashiyim (force) onsara amshiba nokdangtsüatema Mizo People's Forum (MPF) tenzüka aser Mizoram nung election merüka agitsü atema mapadong ajak iba bangdak-i anir inyaker.

MPF-i Mizoram nung election mapang political parties aser candidates ajak atema 'level-playing ground' yanglua yutsür aser item temzüng/ozüng tashi anga nüburtemi election nung shilem agir. MPFji official election watchdog (election commission ama) ka masü sür nung political parties aser nüburtemi kechiba akhümtsüba iba Forum-i ashi anga anidaker? Iba telangzübaji senior reporter kati Mizo daily newspaper ka nung yamai agütsü, "Apart from the fact that Church plays a big role in our Mizo society, the civil society groups are also respected a lot. They are considered to be the moral drivers of our society...so political parties cannot deny them easily, particularly not during an election." Mizo Arogo aser lokti lenirtemji par lokti asoshi moral compass (libaliro lensayur) ama Mizo nungertemi agizüker - kechiyong parnoki par Arogo aser Civil Society jagi par nübur aser lima ajungtsü aser terenlok atema dang kechiserina mapa ajak inyaker ta metet aser yamaji temulung lemtettsüa kuli ngua lir (Trust-capital in religious and social institutions is already present/cultivated).

**Mizoram Arogo aser Laishir lenisüba nung clean election takok ngua inyakba ama Naga lima nunga takok angutsü atema itemi nungdak ta bilemer:**

Arogo aser Laishir lenisübaji nüburtemi agizükettsüa aser temulung lemtettsüa asütsüla.

NBCC/ABAM-i ayongba clean election campaign principles aser practices-ji nüburtemi tamang katettsüa asütsüla, aser Khrista ochiba, temeshiba, tekümtet, yimjung, temeim, temulung lemtetba, ajemaluba, tazüokba, tashi aser shisatsünüburtemi ngutettsüa inyaktsüla. Efesa 6 nung zülua aliba ama, abensa asen Arogoi aser Laishiri subotsü subo nungdang CEC wadang jeta takok ngua inyaktettsü.

Aor lokti ameta lenirtemi Election merüka agitsü telemtetba agitsüla. Aser ibala ama 'social contract' (arok lokti telemtetba) ka meyangu nungbo temelenshi bener arutsü makoktsü. Meimchir mulungjang nung temenen tera alibaji atsüteta indoktsü mulungtet nungdang tajung inyaktsü leman lapoktsü. Iba 'tekümtet' mozüji Arogo aser Laishirtemi Temeshi Laishiba nungi Tanela Temeshi leniba aser tashi nung nüburtem nem agütsütsüla. Kodang civil societies, political parties aser nüburtemi (general public) election agiba yimya merüktettsüla ta angateta iba mapa nung shilem agitsü (participate) mulunga kümdir idangjiang clean election campaign takok angutsü.

Mizo People's Forum ama clean election maparen/agenda implement süa monitoring mapa inyaktsü atema organized body ka tentettsü nungdaker.

Mizoram nung CEC takok anguba tongtibang reasonji Arogoi nungita yariba Mizo People's Forum-i ochi/upright aser tebandang maliba/impartial leadership agütsüba ajanga lir. Mizo Arogo lenirtemji nüburtemi akhümtsübur kechiyong parnoki Tsüngrem tsübur aser Temeshi Laishiba tesayuba ama taküm alir, anungjiang Mizo Arogo ajanga koba alima teraksa asoshi rarar yangji rongsen akar aser tongtibang nisungtemia akümtsüba agizüker.

(Maneni asüng adok nung...)

**Iba Olemsabang nung lemsaba ken-o aser shisatsü ya iba ocet züluri bilemba ken-o ama tazüngerü angateta agitsü mepishir**

## Sri Lanka nung Khristantemi wako tanak songer longkak ait



2019 küm Sri Lanka nung Easter Sunday nü bomb amshia amakba St. Anthony Arogo Tenla kima August 21, 2021 nü Khristantemi wako tanak asongba den 'Ochi mimshibaji yimtenren asalentong ka lir' ta zülua aliba noksa nung angur.

**Colombo (Sri Lanka), August 22 (Agencies):** 2019 küm Sri Lanka nung Easter Sunday nü bomb amshia Tenla ki ana den hotel ana amakba tatalokba sorkari junga bushisüngdang masüba anema Honibarnü (August 21, 2021) Khristantemi Tenla kitem aser pei kidang wako tanak songer longkak aitogo.

2019 küm kiralongrartemi bomb amshia Tenla ki ana aser hotel ana amakba tatalokba nung nisung 269 tashi asü.

Iba ken o dak sendakba nung taoba hopta sorkari nisung 25 anema ken o benokogo, ajisiüaka linük nung Catholic Arogoibo, parnokji tongti aibelenertem masütsüa akok aser sorkari tongti aibelenertem aputsü atema kecha meinyaker, ta aitsür.

Colombo nung tongti putir, Malcolm Ranjith-i, state intelligence ketdangsertemi aibelenertemji meteta liasü aser ajurua liasü, ta ashir.

Islamic State kiralongrar telok den tesendaktep aliba Muslim telok nungi nisung anati mapang kanga atongtepa Tenla

ki ana aser hotel ana nung bomb trok pokdaksü.

Taoba mapang amakba St. Anthony Arogo Tenla kima Honibarnü Khristantemi wako tanak asong aser 'Ochi mimshibaji yimtenren asalentong ka lir' ta ozülü mesanga liasü.

Ano tesem kar nungbo Muslim nungeria Khristantem pusema pei kidang wako tanak songa liasü.

Anepdang 8:45 ako nung tsütsüng atem; taoba mapang kasa mapang nung iba Tenla ki bomb agi poksaja liasü. Tenla kidang sarasadem sentong agi, ajisiüaka tang linük nung coronavirus tenokdangba aliba nisung ishika dang aden.

Ano Negombo nunga St. Sebastian Tenla kima telok tilakati longkak ait. 2019 küm iba tesem nunga nisung 115 pokseta liasü.

Colombo kübok Dehiwala nung aliba St. Mary Arogo nung züngsem Manilal Ranasinghe-i, "Sorkari tatalokba ajak mimshir. Iba tatalokba ya taoba mapang Tir ajanga lir," ta ashi.

Tawa Ranjith-i, "Nisung 25

jagi aibelena mali ta onoki mashir, ajisiüaka iba ya tilateri aibelenertem puer tongti aibelenertem chioksü merangba asü?, ta onoki asüngdang," ta metetdakja liasü.

Attorney general-i chief justice dang züngsem aseme akümba high court bench ka tenteta tekaraba nung item ken o angadangsü tuyuogo.

Ranjith-i mapang shia sorkari Easter anogo nung Tenla ki amakba tatalokba junga bushisüngdang masür ta aiben sorkar aija iba ken o junga bushisüngdangsü takhangba agüja aruogo.

2019 küm foreign intelligence ajanga tekümdangsü osang metetdaksür liasü, aser iba nungji ajemdaker taoba Tir, Maithripala Sirisena aser taoba mapang Ato kilonser, Ranil Wickremesinghe nati iba lendong menokdangtet, ta tena nem tai tongloksü.

Nütsüng million 21 aliba Sri Lanka linük nung Khristan nütsüngbo shilem 7 shi dang lir, aser Khristantem timbaka Roman Catholic lir.

## 'The Chosen' film oshi 90 nung adokogo

**August 22, 2021:** Laishiba otsü nung ajemdaker yangluba film 'The Chosen' sayaba sülen küm ana jungogo aser iba film ya alima tesem ajungalen kanga junga stream asüba ministry ka kümogo.

2019 küm season one sayaa liasü aser tangbo iba film ya Spanish, Arabic aser Chinese densema oshi 90 dak tema nung adokogo.

The Chosen season two taküm Easter Sunday nung sayaa liasü aser iba yaa oshi 30 dak tema nung adokogo aser ano oshi ter dak tema nung adoktsü inyakdar.

Iba series ya India, New Zealand, Nigeria aser United Arab Emirates densema alima tesem ajungalen views million 250 jungogo.

The Chosen series executive

producer, Derral Eves-i, iba series ya views billion 1 ajungtsü onok nükjidong lir, ta metetdaksü.

Iba film nung tongti otsüji Yisu nütsüngtem aser Yisu-i parnok taküm nung kongshibatem indang lir.

"Onoki nisung billion 1 nem iba film reprangdaksütsü nükjidong lir, aser Yisu maru tashi onoki maneni inyaksü. Yisu aruba mapang nung ang onoki ministry mapa anentsü," ta Eves-i ashi.

Nisung billion 1 nem reprangdaksütsü atema oshi meyipzüksüji kanga tongtibang, ta Eves-i ashi. Item series ya The Chosen app nung angati reprangtsü akok.

"Mezüng anogo nungi onoki iba ya nisung billion ka nembosa reprangdaksütsü alizüng ayu.

Alima tesem ajaklen iba series download süa reprangtsü atema app nungdaka liasü. Tangbo iba app ya linük kar dak alaka ajak nung angur," ta Eves-i metetdaksü.

Iba film reprangba ajanga nisung aikati 'kari asen ola angashidar aser asen menen alanzüksü atema melunga lir,' ta angazüker, ta pai ashi.

The Chosen film ajanga nisung aika taküm nung tesangwa bener arutsüdar, ta shia pai, "Asenok tammang lima ka nung alir, aser iba film nung aliba tesangwa jagi nisungtem dak yaloktsür," ta ashi.

The Chosen season 3 atema tenla shilem 56 bendentetogo aser maneni iba season atema tenla bendendar aser otsü zülurtemi otsü renemdar, ta paisa metetdaksü.

## ANO GO ABEN TSÜNGREM DEN

## KIBUBA TSÜNGSÜ NNG JAJABA

"Ni Pa dak lir ta ashibai ashir, Pai koda jajar, paia aji oda jajatsü tim." I Yohan 2:6

Ao pioneers taküm otsütem nung asen tsürabur tajungtem nungi tanü putui tangazüksü senti senmang jenti mebushiteti samaa odaktsüba aika lir.

Par putu tensa nungji kija/kibong aser lokti tentet nung nisungi nisung nem timtem toushi agütsütepba, reshikangshi tia nung parnoki aya aser tzüra arema lenmang aisü nung alima aser nüburtem shih aser tanela nung tiptema aser anisüngzüka lidaktsütsü mechi pei ang takoksa arema maparen jenti nung taküma par tasü tait aser aser tsüngchi tamaren tsüngsütemji bushitet nungbo koda jangratemtsü aser temoatsü süla.

Asen Kibuba Yisu Khrista Pa dak amangbapurasoshi kodanga ramia (samaa) makümba tsüngsü ka toktsübaji ya, "Pai asen meimchir menen alangtsü asoshi asen nungi kecha temelen memeshii dang Pa taküm Pa taküm ajunga bendanga tenlabaji lir".

Anungji külem amangbapurtem, asen kumtetdakba Yisu Khristai renema yutsüba tanelar tsüngnep tsüngsüji pua jajar teyjangja taküm ka süa anogoshia jajatsü Pa nungi angazükdi.

## SARASADEM

Temeim Yisu, Nai temeim agi alima koktet nung iba temeim tsüngsü nung anogoshi jajar taküm ka ni kümdakjang ta sarasadem. Amen

## UK-i Afghani nungi ajenertem anepalua agizüksüla: Rev. Bruce

**August 22, 2021:** Lincolnshire nung Arogo lenir kati Britian nunger dang, Taliban matsüngdang nungi jena arur Afghani nunger anepalua agizüksüji asenok khuret, ta ashi.

Rev. Bruce Thompson ya Lincolnshire Methodist District nung Chairman inyaker; Lincolnshire nung parnok kübok Arogo 145 lir.

"Asenoki Afghani nunger nem teimla agüja liasü saka iba teimla samaogo, anungji parnok anepalutsüji asenok khuret," ta pai ashi.

"Tesüiba küm 20 tashi parnok meyrjang aikati asenok den külemi inyaka aruogo. Parnok aika oshi meyipzüksürtem, sepaitem, secretaries aser security nung tenzüka liasü," ta pai ashi.

"Asenoki Afghanistan toktsüba sülen Taliban-i iba

linük agiogo, aser tang Taliban-i parnok tsükchir ama züngshia parnok lendong nung lir. Anungji parnok anepalutsü aser parnok iba linük nungjagi

anitettsüji asen teinyaktsü khuret," ta paisa ashi.

"Taliban telokibo Sharia ozüng kübok tetsür aser tanurtem kümba lir ta ashir. Sharia ozüngji balala rateter aser Taliban atemabo Sharia ozüng ajanga Afghanistan azüoktsü, anungji yangji alirtem tarutsü tiaji kanga majung," ta pai ashi.

"Sorkari iba linük nungjagi nisung 20,000 anir arutsü ta sangdongogo, aser ibaji tangatsübo jangratemtsüka, ajisiüaka ibaji küm 5 tsüngda anir arutsü atema lir. Kabul airport shibangtsüa akok, kechiyong America nungeri iba airport tekaraba nung toktsütsü, anungji taruba küm pongu tsüngda asenoki komaser Kabul nungi nisung 20,000 anir arutettsü?" ta pai asüngdang.

"Chiyungtsü malirtem linük agiogo, aser tang asenoki mesütsü aser tejenokdak malirtem nem tejenokdak agütsütsü atema asenok aja, ta Khristan lenir ka ama nibo bilemer," ta paisa shisem.

**OLONG PAITEP # 5914**

1				2					3	
						4		5		
6			7							
					8		9			10
11										
12		13					14			
		15								
						16				
	17									
					18					

<b>TIPILEN</b>		<b>LANGTSÜNGLEN</b>	
1. Yakob tetsü	- (6)	2. _ _ _ gki	- (3)
4. Mezüng nisung	- (4)	3. Telungpur telok ka	- (2)
6. Tasen lai kakat ka	- (5)	5. Tsüngremi mezüng	
9. Au lanu	- (2)	poktetdaktsüba	- (5)
12. Tejen lai 21 buba	- (11)	7. Tia	- (4)
15. Tekolak tembar	- (2)	8. Yakob-er jabaso ka	- (5)
16. Zütsüra anepsang	- (5)	10. Abraham tebutzü	- (4)
17. Kain tenu	- (4)	11. Rebeka kinungpu	- (4)
18. Hana-er jabaso	- (6)	13. Esau tenu	- (5)
		14. Tzünglu tilala aru	- (4)
		16. Jafet tebu	- (3)
		17. Teka agi kongshi	- (2)

**OLONG PAITEP # 5913 TELANGZÜBA**

<b>TIPILEN :</b>		<b>LANGTSÜNGLEN :</b>	
2. Pongsen, 5. Lepko, 7. Omen, 8. Maongka, 10. Yangkhu, 12. Senpong, 14. Angu, 15. Raksa, 16. Arameso,		1. Alimang, 2. Pongen, 3. Samaru, 4. Nün, 6. Pio, 9. Nüngdak, 10. Yongya, 11. Kongro, 13. Ora, 14. Ata.	

**ALOKBA O MEDEMERTEM RIDDLES ASAYAR :**

**Alokba** : Tembarten, tanübo time pass riddles kar asayadi, ni tama chance agidini?

**Medemertem**: Challoo.

**Alokba** : Iba chair nung tapok asem, ka tuluba, ka tomba aser ka tilaba ta alibaya angur südi?

**Medemertem**: Hau angur.

**Alokba** : Ni tang iba chair nung mener scü tashi agi pezüksü, Idangji gasji koba tapoki alur aji shitettsüla. Angateter südi? One, two three "Phoooot" Ji aji koba tapok nungi gasji alu?

**Sobangba** : Tapok tomba nungi alu amaia.

**Polokba** : Tilaba tapok nungi aluako aji.

**Semsemba** : Aeeet, tapok luluba nungiang mesüker akoti.

**Alokba** : Nenok ajak tai, iba gasji kü scükipong tapok nungi alu!

**Medemertem**: Oh Alokba!

Lilir : WhatsApp

**TANÜBO NAI LANGZÜANG**

Q. Koba küm HCL ngutet?  
 A.1908      B.1956      C.1976      D.1988

===== (Taruba adok nung onoki langzüksü)

**YASHI ADOK TELANGZÜBA : Chennai**

**AO OSHI ANGAZÜKDAK:**

**TANÜ ANGAZÜKTSÜBA OJANG**



**Kosen**  
 (n) teni nungi azü ayimba ( nose bleeding)  
 \* Teni nungi **kosen** senra yakta mozü ki bushitsüla.

**Koshi**  
 (n) Patio tupak 20 ( a unit contains 20 betel leaves)  
 Tanü asüngbo patio **koshi** nung sen aika meshir.

**NAI-A YA METETTER MA?**

**AUGUST 23 NÜ ASOR TONGTIBANG NISUNG KAR:**

- French King Louis XVI (1754)
- Dancer/actor/director Gene Kelly (1912)
- Baseball Hall of Fame member George Kell (1922)
- Actor Vera Miles (1929)
- Actor Barbara Eden (1931)
- Political comedian Mark Russell (1932)
- Actress Saira Banu (1944)
- Drummer Keith Moon (The Who) (1946)
- Actor Shelley Long (1949)
- Singer/actor Rick Springfield (1949)
- Jordan's Queen Noor (1951)
- Actor Jay Mohr (1970)
- Actor River Phoenix (1970)
- Pro basketball star Kobe Bryant (1978)
- Musician Julian Casablancas (1978)
- Olympic gold medal-winning swimmer Natalie Coughlin (1982)
- Actress Vaani Kapoor (1988)
- Rapper Lil Yachty (1997)

**SUDOKU # 5955**

**TELANGZUBA # 5956**

	4					3	5	1	8	4	2	7	5	9	6	3
7	5	1			9		8	9	6	3	1	8	4	2	7	5
	6				1	9		2	7	5	9	6	3	1	8	4
8					3		2	4	1	8	5	3	2	7	9	6
1		5			6	4		7	2	9	4	1	6	5	3	8
3	7	4			2			5	3	6	8	9	7	4	1	2
	3	7				2		6	4	1	7	5	8	3	2	9
5	8		3		7			8	9	2	3	4	1	6	5	7
6			8		4		7	3	5	7	6	2	9	8	4	1

**OJANG LUTEP # 5500**

ENASI :

AKTSINYÜ :

UNGTMOLETBA :

PAMA :

AK :

INYAMEKI :

NGDA :

YUTSTSÜÜ :

NGKAA :

SATAK :

**OJANG LUTEP TELANGZÜBA # 5499**

**TEMAOTSÜ AMA TENÜKSÜNGA AMSHI SAKA JANGRATAMA TATEM TASHI MAGITET**

**TAN HOPTA ATEMA - KOMA SÜLA ?**

Q. Tetsür o tetsür na aser tebur o tebur na apuani kümer aliba kibong arogo nung züngsem kümdaktsü nunga koma süla ?

## IAF tayimtsü ajanga Kabul nungi India nunger 107 anir aruogo



August 22, 2021 nü IAF tayimtsü ka ajanga Afghanistan yimtiba, Kabul nungi arurtem New Delhi anasa Hindon Air force tonga arudang tangokba noksa nung angur. IAF tayimtsü ajanga India nunger 107 den bendanger 61 anir aruogo, ta Ministry of External Affairs-i metetdaksü.

**New Delhi, August 22 (Agencies):** Amongnü anepdang Afghanistan yimtiba, Kabul nungi Indian Air Force (IAF) C-17 tayimtsü ajanga India nunger 107 densema nisung 168 India tonga anir aruogo; tayimtsüji New Delhi anasa Ghaziabad nung aliba Hindon Air Force base nung anenzük.

Honibarnüa Air India aser Indigo tayimtsü na ajanga Kabul nungi nisung 350 anitetba sülen

Tajikistan yimtiba, Dushanbe aser Doha (Qatar) na nungi tayimtsüji anepdang Delhi tonga

Passengers ajak dak COVID-19 RT-PCR test agiba sülen ang airport nungi aotsü melatsü, ta ketdangsertemi metetdaksü.

Ministry of External Affairs (MEA)-i ashiba agi, tang Afghanistan linük nung India nunger 400 shi anünga lir. Afghanistan nungi India nunger anir arutsü atema anogo shia Kabul nungi tayimtsü ana dang senzütsü melar.

America aser North Atlantic Treaty Organization (NATO) sepaitemi Hamid Karzai

International Airport ketdangstüdar aser parnoki melaba sülen India nunger anir aru.

August 15 nü Taliban teloki Afghansitan agiba sülen US-i nungitba Ashraf Ghani sorkar atsüngdoka liasü.

Taliban-i iba linük agiba sülen nisung aikati iba linük toktsür oner aser linük balalai peipei sensotem iba linük nungi anitetdar.

MEA-i, Narendra Modi-i aniba sorkari India nunger ajak Afghanistan nungi anir arutsü atema inyakdar, ta metetdaksüogo.

## UP nung BJP nungi mezüng CM inyaksang, Kalyan Singh süogo



August 22, 2021 nü Lucknow nung Uttar Pradesh Chief Minister, Yogi Adityanath-i taoba mapang UP Chief Minister aser taoba mapang Rajasthan Angh, Kalyan Singh nem akhüm agütsüba noksa nung angur.

**New Delhi, August 22 (Agencies):** Taoba mapang Uttar Pradesh nung chief minister, Kalyan Singh Honibar ayaterm nung Lucknow nung aliba Sanjay Gandhi Postgraduate Institute of Medical Sciences nung süogo; pa arrshi küm 89 liasü.

1991 küm Uttar Pradesh nung BJP-i mezüng sorkar akümba mapang nung pa Chief Minister shima liasü; pa temang shilem balalai mapa meinyaki liasü.

Hospital-i sangdong ka ajanga, "Taoba mapang UP Chief Minister aser taoba mapang Rajasthan Angh, Kalyan Singh alima nungi pilaogo. Pa dak sepsis tashidak den temang shilem balalai mapa meinyaki asü," ta metetdaksü.

Pa temang nung timtem tulu adokba sülen July 4 nü nungi intensive care unit (ICU) nung pa treatment tagidak liasü.

Pa Chief Minister inyakba mapang nung Babri Masjid raksaja liasü, aser iba ken o dak sendakba nung pa nem-a tai tonglokja liasü. 2014-15 küm pa Rajasthan nunga Angh inyakogo.

Ato kilonser, Narendra Modi-i twitter ajanga, "Kalyan Singh-i loktiliba nung meshimejunger crore aika atema ola adoka inyakogo. Aluyimertem, lanurtem aser tetsürtem nem tashi agütsütsü atema pai mapa aika inyaksüogo," ta metetdaksü.

Singh asüba osang sangdongba sülen Uttar Pradesh Chief Minister, Yogi Adityanath-i SGPGI semdang, iba sülen pai,

state-i anogo asemnü asür atema mangyimtsü, ta metetdaksü.

Yogi-i, "Iba ya asenok ajak atema takoksa tulu. Lenir tasümgang hospital nungi par kidangi bener aotsü aser Amongnü pa tasümgang Vidhan Bhawan aser UP BJP office na nung yur akhüm agütsütsü," ta metetdaksü.

Uttar Pradesh BJP unit nung mezüngbuba Tir, Madhav Prasad Tripathi 1984 küm asüba sülen Kalyan Singh BJP state Tir shima liasü.

Kalyan Singh ya 1932 küm January 5 nü aso aser 1967 küm mezüng MLA inyak. Iba mapang nungjagi tenzüka pai assembly election aika nung takok ngua party menden balala nung inyaka aru tesüsa pa Rajasthan Angh inyaka liasü.

## Pelaba Lemsateper

"Kechiyong pai jashidaksüaka, aji saka pa aria bilemba jenti, pa temeim yimlibilem yari alitsü." - Aiatai 3:32

Onoki teti meima aliba obala, **Asür Intimakzuk Longkumer** (Unger) akümüli wadang temer iba lima nungi pilaba mapang ozü kibong den yariteper ajak dang temulung taroktiba nungi pelaba lemsateper.

Nenek kija shia dang pelaba meshitetaka, asen Tulusang Tsüngremi nenok ajak moshia moatsütsü ozü sarasadem.

Alakteta pelar :

1. Kohima Ao Baptist Church
2. Lerie Colony Panchayat Kohima
3. Lerie Youth Organization Kohima
4. Kohima Unger Senso Telongjem
5. Kohima Unger Fellowship
6. Kohima Kangtsung Senso Telongjem
7. Kohima Kangtsung Fellowship
8. Staff of E.E. Generation Division, Dept of Power Kohima.
9. Kinunger, tembar aser kidanger.

~ Jabaso, Jalatem, Anükapang aser Semchirtem.



ASO : 28.09.1946  
ASÜ : 09.08.2021

## Mehbooba Mufti-i J&K atema state jenjang meshir

**Srinagar, August 22 (Agencies):** Taoba mapang Jammu & Kashmir nung Chief Minister aser Peoples Democratic Party (PDP) tongti, Mehbooba Mufti-i, yimjung aser tesünep alitsü atema Jammu & Kashmir nem tanaben state jenjang agütsütsüla, ta ashi.

Kulgam district nung lokti senden ka nung jembidang lai, Kashmir nung teti tesünep alitsü atema India sorkari J&K nem tanaben state jenjang agütsütsüla, ta ashi.

2019 küm Centre sorkari Arlla 370 aser 35A agiena liasü.

Laisa, Centre sorkari ken o jembiba ajanga dang Kashmir ken o latettsüla, ta ashi.

Ano külen People's Conference (PC) Chairman, Sajad Lone-i Hokolbarnü Congress Tir, Sonia Gandhi leniba nung opposition party 19 senden amenba mapang nung Jammu & Kashmir nungi regional party lenirtemi Arlla 370 atema süoka mejembiba atema aitsü.

Opposition party tem senden nungji Peoples's Conference party bo maden.

Sajad-i, party 19 jagi Arlla 370 aser 35A atema mejembiba tetezü parnoki Centre sorkari item Arra agienbaji pusemer, ta ashi.

Sajad-i sangdong ka ajanga, "Opposition party 19 senden nung (J&K atema) state jenjang aser Arlla 370 & 35A atema mejembibaji J&K anema inyakba pusemba den kasa. Senden tembangba sülen parnoki sangdong ka agütsü, aser iba nungji BJP sorkari 2019 küm August 5 nü Arrlatem agienba indang shia mali," ta metetdaksü.

Nüburtemi Arlla 370 aser 35A den domicile temedentem akhanger, ajisüaka opposition party temi ibaji amadokogo, ta pai ashi.

"Iba senden nungji NC nungi Farooq Abdullah aser Mehbooba Mufti nata denogo. Ajisüaka tenati Arlla 370, 35A aser domicile temedentem atema opposition party tem den melemsatep. Gupta Declaration nung aliba takhangbatem atema mejembitettsü süra kechiba lenir anati iba senden nungji aden?," ta pai asüngdang.

## India nung ano Covid agi nisung 403 asü

**New Delhi, August 22 (Agencies):** India nung ano nisung 30,948 dak coronavirus putet aser iba tashidak agi shiranger 403 süogo, ta Amongnü Union health ministry-i metetdaksü.

Tang tashi nung India nung nisung 3,24,24,234 dak coronavirus tashidak putetogo aser iba tashidak agi shiranger 4,34,367 süogo.

Tang linük nung coronavirus agi teshirangdakpur 3,53,398 dang kümogo, aser ibaji coronavirus caseload nungi shilem 1.09 dang lir, ta Amongnü anepdang 8:00 ako nung Union Health Ministry-i metetdaksü.

Tesüiba ghonda 24 tsüngda coronavirus agi shiranger 7,942 anepogo. Amongnü samples

15,85,681 tendang aser tang tashi nung samples ajak sensteper 50,62,56,239 tendangogo, ta ICMR-i metetdaksü.

Tang anogo shia coronavirus positive putetba shilem 1.95 dang kümogo aser tesüiba anogo 27 tashi coronavirus positive putetba shilem 3 dang nungi tajemba.

Tang tashi nung coronavirus agi shiranger 3,16,36,469 anepogo aser iba tashidak agi shiranger asüba shilem 1.34 dang lir.

Honibarnü aonung 7:00 ako tashi nung India nung coronavirus vaccine dose lakh 43 dak tema agütsü aser tang tashi nung linük nung vaccine dose crore 58 dak tema agütsüogo.



US mitkar indang tayimtsü ka Afghanistan nungi nūburtem anir arua Honibarnü Germany nung aliba Ramstein Air Base tongli Afghan tsür kati tanur ka soa liasü. Taliban-i Afghanistan amokbanger tetsürta ya tanaben jena aoba mapang C-17 transport aircraft nung tanur ya aso, ta US Air Mobility Command ajanga Deobarnü tweet ka nung ashi.

## Kabul airport nung rongrong-shirong manener

**Kabul, Luroi/August 22 (Agencies):** Taliban-i Afghanistan linük tanaben agiba ajanga nūburtem linük yutsür jena aotsü merangba mapang Kabul indang international airport anasa Afghan nunger nisung tenet tepsetogo, ta British military ajanga ashi.

Saka UK defence ministry ajanga parnok ya kodang tepsetar mashi aser yangji Honibarnü nisung pezü ajemsetba densema ali asü maliar mashi.

Hopta ka tejakdang Kabul yimti telungi aitba Taliban dang

nungi ajentsü merangba nisung meyerijang aika airport sünga adenshia lir. Nūburtem jet tem nung ayaloka aliba noksa ngua US aser Britain densema linük balalai nūburtem anizüker aoba meilongi inyaker, ta sayur.

Tesüiba anogo ishika tayimtsü anendak nūburtem tayimtsü nung mener linük yutsür aotsü merangba mapang nisung ajemsetba liasü.

US embassy ajanga security tsütsü tekum dangtsü tasen ka metedakja nūburtem dang US sorkar nung ketdangsurtemi totuyuba magütsü tashi Kabul airport-i

maotsü ashi. Tir Joe Biden-i par nūburtem tayimtsü nung anir arumatsü asoshi tejangja meshitetsü, ta shiogo.

United States indang rara talangba jangra matem ka nung tembanga arur.

Taliban teloki ano maneni Afghanistan yimtiba amokbanger lia US sepaitem Kabul yutsür aor, koba küm 20 tejakdang America sepaitemi Taliban ket nungi rakzūka liasü.

US-i küm 20 nungita arur kanga kera Afghan sorkar chirepba ajanga Washington indang tashi telatet ka dang lir ta aikati ajiteter.

## Australia PM-i lockdown bukuma jemb



Scott Morrison (File photo)

**Canberra, Luroi/August 22 (Agencies):** Australia nung sorkari coronavirus tensa azüoktsü asoshi lockdown benoka aliba indang bukuma Ato Kilonser Scott Morrison-i ashi aser anogoshi iba tashidak tali tali puteta aoba mapang linük nūbur shilem 70 shi vaccine magi tashi lockdown ya alitsü, ta ashi.

Deobarnü kanga kera menatepa aoba Delta variant nisung 914 dak putet, koba Honibarnü nisung 894 dak puteta liasü.

"Nai teti lockdown nung melitetsü, aser mapang ka melenshitsüsa akumtsü aser ibaji shilem 70 nung alitsü," ta Morrison-i Australian Broadcasting Corporation den television nung sensaksemba mapang ashi.

Shilem 70 majung tashi iba

tashidak azüoktsü asosh lockdown ya federal sorkar indang tongtipang shilem ka lir, aser shilem 80 ajungba mapang arütsü tanemi lapoktsü. Saka tenokdangba tesashi agi aika jashir.

Sydney aser Melbourne nung Deobarnü lockdown anema longkak aitba mapang police temi nisung noklang aika apu, koba linük nung nūtsüng yongsük timtiba aliba New South Wales aser Victoria yimtiba alitsü, kong lockdown tesashi benoka lir.

Victoria nung tashidak wara tenzüker tang agi lockdown trok buba alitsü, kong yangji menatepa aoba cases 65 Deobarnü puteta tang iba yimti nung active cases 440 lir.

"Iba atema onoki mera ajak agir," ta Victoria state indang health minister Martin

Foley-i ashi.

New South Wales nung Deobarnü nisung tasen 830 dak COVID-19 putet aser linük yimtiba, Canberra aliba Australian Capital Territory nung nisung 19 dak putet. Australia nung tang active cases 12,000 jungnüa lir.

Australia nunger arishi küm 16 dang tema shikem 30 shi vaccine course tembanga agiogo, ta Honibarnü health ministry data ajanga ashi. Ibai talisa Pfizer mozü agi anungba aser AstraZeneca mozü nūburtemi molungsoa magiba ajanga lir.

Saka tawa Delta variant prokshia mozü timba anguba ajanga iba mozü agirtem timba kumogo. The Australian osangkakt asoshi tan ita Newpoll ka agiba nung shilem 11-i mozü magitsü molungsoa ashi.

New South Wales nung mozü agitsü temsüa alir shilem 57 shi dose ka agiogo aser shilem 30 shi dose anaprong agiogo.

"Nūburtemi tang yimya nung mozü agira, New South Wales nung October, November tashinung tajungba akumtsü," ta state Health Minister Brad Hazzard-i ashi.

Delta variant ajanga iba tashidak wave tasembuba tenzüker Australia nung COVID-19 agi meneper nisung 44,000 majung aser tasüba 981 lir.

## Myanmar military-i osangbener ana apu

**Yangon, Luroi/August 22 (Agencies):** Myanmar nung military sorkari an local osang bener ana puogo, ta army meyong television-i Honibarnü metetdaksüogo.

News site Frontier Myanmar nung columnist aser Voice of America radio commentator Sithu Aung Myint aser BBC Media Action atema freelance producer Htet Htet Khine na August 15 nü puogo, ta Myawaddy TV sangdong ka ajanga metetdaksü.

Sithu Aung Myint ya sorkar anema inyakba aser junta anema osang teyazü prokshiba den nūburtem dang longkak aiba sentong nung shilem agitsü aser opposition teloktem pusemstü atema nūburtem ajungshiba asoshi aitsüogo, ta Myawaddy-i ashi.

Kasa mapang nung Htet Htet Khine ya ozüng raksar Sithu Aung Myint nem teyari agütsüba atema aser shadow National Unity Government pusemba aser iba sorkar atema inyakba atema aitsüogo.

BBC Media Action sangdong ka ajanga ashiba agi, parnok Htet Htet Khine teküzmükba aser la anema ken o benoka aliba atema shisabulua bilemer aser tensa kanga

kümdang meita atdar. Reporters Without Borders (RSF)-i ashiba agi, osangbener ana den tesendaktep makai kümogo.

"Onoki tena apuba aitsür aser iba ajanga military junta-i osangbenertem amokmerenba kuli agütsür," ta Asia-Pacific desk tekolakba Daniel Bastard-i ashi.

Myanmar maneni mepetmesü nung lir aser army yimsüsüba kübok nisung 1000 dak tema tepsetogo, ta activist group kati ashi.

Military-i news outlet aika indang licenses aginogo. Parnoki ashiba agi, media-i shilem agiba parnoki akhümtsübur saka osang tai mesera nūburtem mesüngjemeteti kümdaktsütsü atema osang prokshitsü memelatsü.

Committee to Protect Journalists-i taoba ita sangdong ka ajanga ashiba agi, Myanmar yimsüsürtemi independent journalism kanga takok ngua raksatsüogo.

Human Rights Watch-i taoba ita ashiba agi, army sorkari tang tashi nung osangbener 98 puogo. Osangbener 46 July ita tatem tashi nunga mechioki liasü.

## Pakistan-i Kartarpur Sahib semdangtsü atema temelaba agütsü

**Islamabad, Luroi/August 22 (Agencies):** Coronavirus wara wave pezübuba nokdangtsü merangba mapang ka süaka Pakistan-i taruba ita nungi Sikh nunger temeshi aine aoertem nem Gurdwara Darbar Sahib Kartarpur semdangtsü atema temelaba agütsüogo. Kartarpur shrine lapoktsütsü atema National Command and Operation Centre (NCOC)-i Honibarnü telemteba agiogo. Sikhism ngutetsang Baba Guru Nanak Dev asüba anogo September 22 nü amungtsü lia tang iba tesem lapoktsüogo.

Dawn osang kaket sangdong ka ajanga ashiba agi, NCOC senden nung Sikh nunger temeshi aine aoertem nem taruba ita Kartarpur semdangtsü atema telemteba agi, ajisüaka COVID-19 inyakyim tesashi kübok maparen ajak inyaksangshitsü. Delta variant pokteter aliba ajanga Pakistan nung India May 22 nü nungi August 12 nü tashi category C nung idaktsür liasü aser Sikh nunger temeshi aine aoertem densema India nungi aoertem temelaba balaka agitsü nungdaka liasü.

Ajisüaka tangbo vaccine ajung agir alirtem certificates bener Pakistan-i aitsü melatsü, ajisüaka parnoki ghonda 72 tsünga agiba RT-PCR test report dena sayutsü nungdaker. Iba dak alia airport tem nung Rapid Antigen Test (RAT) agitsü aser tashidak keta aliba potetra Pakistan-i aitsü

memelatsü. Maneni non-pharmaceutical interventions (NPIs) tetuyuba kübok darbar nung mapang ka nung nisung 300 dang adenshitsü melatsü.

Ministry of National Health Services (NHS) ketdangsurtemi ashiba agi, coronavirus tashidak menatepa aoba nokdangtsü atema linüktem shilem asem kuma lemsatsüogo. Category A nung aliba linüktem nungi arurtem dak COVID-19 tashidak metendangtsü aser category B nung aliba linüktem nungi arurtemi ghonda 72 tsünga agiba negative PCR test report sayutsü nungdaker. Kasa mapang nung category C nung aliba linüktem nungi nūburtem nem tenokdangba agütsüogo aser NCOC tetuyuba kübokang linük semdangtsü melatsü, ta ketdangsurtemi ashi.

Taoba ghonda 24 tsünga nisung 3,842 dak tashidak poteta tashidak menar ajak senteper nisung 1,123,812 ajungba mapang ka nung Kartarpur semdangtsü atema tenokdangba agütsür aliba salatsütsü asoshi telemteba agiogo. Kasa mapang nung taoba ghonda 24 tsünga Pakistan nung nisung 75 asüba sülen asür 24,923 jungogo. Pakistan nunga vaccine agütsüba sentong benoker inyakyonga odar aser Sinovac vaccine million 2 Honibarnü Pakistan tonga aruogo. Tang tashi nung Pakistan nung vaccine dose million 46.45 agütsüogo.

## '2021 Hyundai Mercury Prize' nung Celeste-i shilem agitsü



Celeste

**New York, Luroi/August 22, 2021 (Agencies):** Aruya aliba '2021 Hyundai Mercury Prize' sentong nung shilem agitsüpur rongnung Laura Mvula, Celeste aser Arlo Parks nung denogo.

Nüngtugu music sentong - 2021 Hyundai Mercury Prize ya September 9, 2021 nü Eventim Apollo, Hammersmith nung ayongzüksü aser BBC Radio 6 Music nungi Lauren Laverne-iba sentong tanaben ketdang (host) asütsü osang jangjaogo.

"2021 Hyundai Mercury Prize Awards Show ketdang asütsü kü nem lemezüksüba atema pelar. Iba sentong nung British aser Irish music tem sayutsü aser iba show nung shilem agirtem repringtsü asoshi

yongyar," ta Lauren-iba ashi.

Iba Award sentong nung, BERWYN, Black Country, New Road, Ghetts, Hannah Peel, Mogwai, Nubya Garcia aser Wolf Alice nungeri shilem agiba angutsü.

'Blue Weekend' atema Wolf Alice tasembenbuba nomination nguogo. 2018 küm iba telok ajanga 'Visions of a Life' atema award angu aser 2015 küm 'My Love Is Cool' atema parnoki nomination ngua liasü.

Arlo indang mezüing kensep 'Collapsed In Sunbeams' ajanga taküm sentong nung award angutsü imlar.

Laura indang 'Pink Noise', Celeste - 'Not Your Muse', Black Country, New Road indang 'For

the First Time' aser Ghetts' 'Conflict Of Interest' tem nomination top 12 list nung lir.

Iba shortlist atema 2020 winner Michael Kiwanuka, Anna Calvi, Annie Mac, Jamie Cullum aser 6 Music & Radio 2 nung Head of Music, Jeff Smith densema panel kati telemetba agitsü.

Taoba mapang, Mercury Prize Award angur rongnung Dave, Wolf Alice, James Blake, Skepta aser Arctic Monkeys nung dena lir.

### \* 2021 Mercury Prize shortlist:

- Arlo Parks - 'Collapsed In Sunbeams'
- BERWYN - 'DEMOTAPE/VEGA'
- Black Country, New Road - 'For the First Time'
- Celeste - 'Not Your Muse'
- Floating Points, Pharoah Sanders & The London Symphony Orchestra - 'Promises'
- Ghetts - 'Conflict Of Interest'
- Hannah Peel - 'Fir Wave'
- Laura Mvula - 'Pink Noise'
- Mogwai - 'As the Love Continues'
- Nubya Garcia - 'SOURCE'
- SAULT - 'Untitled (Rise)'
- Wolf Alice - 'Blue Weekend'

## Assam Rifles-i sentong balala ayongzük

**Dimapur, Luroi/August 22, 2021 (TYO):** World Senior Citizen Day anogomung nüngtem nung, Honibarnü (21.08.2021) HQ IGAR (North) kübok Mokochung Battalion - Assam Rifles-i Mon, Longleng aser Mokochung District nung tantsü-tambu/teintet rogo semdang aser pei pei tesem nung nüburtem yimji-yimjung aser tesünep nung alitsüsa lokti asoshi khuret bona shilem tulu agiba atema team-i parnok (tantsü-tambu) dang pelaba metetdaksü.

Assam Rifles puri mapa tajung inyakba ngua, tantsü-tambu temi AR team dang pelaba metetdaksü aser iba anogomung (World Senior Citizen Day) nung Assam Rifles-i tantsü-tambu tem bilemteta parnok nem akhüm tetushi agütsüba maparen loktii pelashishia agizükogo.

Deobarnü (22.08.2021), HQ IGAR (North) kübok Assam Rifles indang HQ 25 Sector aser u/c unit ajanga Arunachal Pradesh kübok Jairampur, Changlang, Longding, Niauxa aser Pongchau nung kaketshirtem, tsürabur malir tanurtem aser yimertem den Raksha Bandhan benjongmung mungogo.

Iba benjongmung mapang, Purvottar Orphanage, Tinsukia nung 'Rakhi' alenba, nanglong aser jang-o-tsü lema agütsüba sentong achaayanga agiogo. Iba benjongmung atema, AAI Day Care Centre, Mumbai aser Inner Wheel Club of Pannel, Mumbai nung alir tanurtemi süngiang balala agi yangluba Rakhi den card' tem Jairampur Battalion-i agizük.

Lisopur aser security forces tsüingda tesendaktep tali akangshitsü nükjidong yur iba

sentong ayongzük. Samuhik Raksha Bandhan benjongmung tepor junga ayongzükba atema lisopurtemi Assam Rifles dang pelaba metetdaksü.

Kasa anogo (22.08.2021), HQ IGAR (North) kübok Jalukie Battalion - Assam Rifles den PHC, Athibung longjemer Old Beisumpui village, Peren District nung Medical Camp cum Vaccination Drive ayongzük liasü.

Coronavirus indang variant balala agi alima nung meimchir tem timtemba mapang, nüburtem iba tesashi wara nungi kümzük ayutsü asoshi vaccination drive timba achaayanga agitsü asoshi asalentong yangludar. Ajisüaka, yimtsüing aser jila tesem aika nung nüburtemi vaccine indang tajangzük memetet asünung, tang ama mapang vaccination drive ya nüngdakba maparen ka lir.

Old Beisumpui nung vaccination drive atema, medical tekolakpurtemi Assam Rifles den ajurutep aser medical staff temi teyari agitsü.

Iba medical camp aser vaccination drive nungi tebur 39, tetsür 58 aser tanur 22 densema nisung 119 ajangzükogo.

Nübur ajangzüksü asoshi metitemi teyari agütsüba atema, Civil administration aser medical tekolakpurtemi Assam Rifles dang pelaba metetdaksüogo.

Deobarnü, Raksha Bandhan benjongmung nüngtem nung Heraka tetsür teloki Heningkunglwa village aser Tening Town, Peren District nung HQ IGAR (North) kübok Jalukie Battalion - Assam Rifles semdanga liasü.

Raksha Bandhan benjongmung nung, Jalukie B nungi Heraka tetsür teloki

tepela temaitsü sayutsü asoshi parnoki sepaitem semdang. Yimji-yimjung/tesünep den terenlok maparen bener aruba aser nübur asoshi bendanga agüja inyakba atema, kakat zülur aser Heraka community nung nübu tajung, Wt. Tasile Zeliang den tangartemi security forces dang pelaba metetdaksü.

Nübur aser security tsüingda ochi aser telongjem nung aotsü asoshi adianu (brother & sister) ama tesendaktep tajung nung maneni amalitepa aotsü imlar, ta parnoki lemsatop.

Maneni, Pokhpor yimtsüing nung anentsüh agi lenmang nokdang aliba lapoktsütsü asoshi, Deobarnü (22.08.2021), HQ IGAR (North) kübok Kiphire Battalion - Assam Rifles-i 'JCB excavator' ajanga anentsüh agi anebanger aliba lenmang merüktetja liasü.

Tesüiba anogo ishika nungi tzünglu metitemi aruba ajanga, Pokhpor nungi Kiusam Junction den Pungro aser Kiphire tsüingda tesem kar anentsüh sashia aliba ajanga lenmang nokdanga nüburtem mesenzütetti liasü.

Anentsüh agi anebanger aliba lenmangtem merüktettsü JCB agütsüba atema Pokhpor Putu menden ajanga Assam Rifles dang pelaba metetdaksü.

Item tesem nung anentsüh agi lenmang nokdang aliba osang angashia, Assam Rifles-i Kiphire Bn. indang Thongsonyu COB den JCB yoka lenmang lapoktsü. Nübur nüngdakba ajiteta mapang shitak nung teyari agütsüba atema, Village Council züingsem, yimtsüing nung tantsü-tambu aser lisopurtemi Assam Rifles dang pelaba metetdaksüogo.

## OFFICE OF THE LONGJANG TZÜDILEPDANG SEMCHIR TELONGJEM

DIMAPUR UNIT, DIMAPUR-797112, NAGALAND

### TENÜNGSANG AGÜTSÜR

Er. Y. Chuba aser Lt. Dr. Alangla na jabaso **Wb. C. Limawati Imchen**, Nagaland Armed Police nung Commandant jenjang ngutetba takok asoshi Longjang Tzüdilepdang Semchir Telongjem, Dimapur Unit-i pa nem tenüngsang tulu agütsür. Ano tarutsü nunga nü mapa nung maneni takok ngudakjangma ta onoki sarasademtsür.

Sd/-  
(T.LANU IMCHEN)

President, Dimapur Unit.

Sd/-

(LIMA IMCHEN)

Secretary, Dimapur Unit.

## Foo Fighters puri 'Global Icon Award' agizüksü



**New York, Luroi/August 22, 2021 (Agencies):** 2021 MTV VMAs sentong nung, nüngtugu kentener telok Foo Fighters-i Global Icon Award agizüksü.

Dave Grohl aser külem teloki, parnok indang LP 'Medicine At Midnight' nungi 'Shame Shame' atema Best Rock, Best Cinematography aser Best Choreography award atema shima lir.

September 12, 2021 nü Brooklyn, New York kübok Barclays Center nung 'MTV Video Music Awards 2021' sentong agitsü aser rock kentener teloki band' ka ama parnok ken ajanga fans tem ajungmesoa aser takok anguba atema 'Global Icon Award' agizüksü.

Kasa sentong nung, Foo Fighters-i sabang nung ken tena shilem agiba angutsü. Parnok den külemi, iba Award sentong nung Olivia Rodrigo, Machine Gun Kelly, Lorde, Lil Nas X aser Camila Cabello nungeri shilem agitsü terenemba lir.

MTV Video Music Awards sentong nung nomination timtiba angur artists rongnung Justin Bieber asütsü. Justin-i temaba category asem densema Video of the Year, Artist of the Year aser Best Pop nung nomination ngua lir.

'Yummy' ken atener Justin-i DJ Khaled aser Drake na indang 'Popstar' music video nung shilem agiogo, koba Video of the Year aser Best Direction' atema nomination nguogo. Kasa mapang, Justin indang ken 'Peaches', kong Daniel Caesar aser Giveon na dena lir, iba ken atema Best Collaboration, Best Pop aser Best Editing nung nomination ngua lir.

Ano, Best Cinematography category nunga Justin-i nomination nguogo, kong Chance The Rapper den pai 'Holy' ken yanglua liasü.

Justin sülen, nomination timba angur rongnung 'Megan Thee Stallion' asütsü. MTV VMAs nung lai nomination trok ngua lir aser item rongnung timbaka la aser Cardi B na indang nüngtugu track 'WAP' nungi asütsü. Iba ken ajanga Video of the Year, Song of the Year, Best Collaboration, aser Best Hip-Hop nomination nguogo.

Rapper - Megan Thee Stallion-isa Artist of the Year' atema nomination ngua lir aser Lil Baby indang ken 'On Me' nung shilem agiba atema, lai Best Hip-Hop category atema tokteptsü.

Billie Eilish, Doja Cat, Drake, Lil Nas X, Olivia Rodrigo aser K-Pop telok BTS densema artists balala tasembuba jenjang atema tie' den nomination pungongo ngua lir.

'Butter' kentener telok - BTS-i Best Pop, Best K-Pop, Best Editing aser Best Choreography densema parnok indang 'chart-topping hit' ken balala atema nomination timba nguogo.

BTS pur indang nomination pungobuba ji Song of the Year category nungi asütsü, kong 'Dynamite' shortlist nung dena lir.

2013 küm Brooklyn kübok Barclays Center nung iba sentong agir külen nungi, taküm iba tesem nung mezüing "2021 MTV VMAs" sentong ayongzüksü asoshi terenemba lir aser September 12, 2021 nü iba sentong live sayutsü.

# Taoba Indian Football Team Assistant Coach Hakim süogo



Syed Shahid Hakim



**Luroi/August 22, 2021 (Agencies):** Olympian footballer aser FIFA international referee Syed Shahid Hakim Deobar anepdang Gulbarga, Karnataka kübok mozüki ka nung süogo. Pa arishi küm 82 liasü aser pai kinungtsü aser jala ana toktsür iba lima nungi pilaogo.

Pa dang Hakim saab ta jaa liasü aser pa 1960 Olympics nung India football team nung züngoksema liasü. Pa FIFA international referee ka liasü aser Doha nung 1988 küm AFC Asian Cup asayaba mapang pai asaya aika achaayangogo. Domestic jenjang nung pa 1960 küm Santosh Trophy akokba Services' team nung dena liasü.

Maneni pa kasa team nung 1960 nungi 66 tashi asaya. Club jenjang nung pa City College Old Boys (Hyderabad), aser Indian Air Force team nungi asayaogo.

Hakim ya taoba mapang Indian national team assistant coach liasü aser ano pai 1998 aser 1999 küm Mahindra and Mahindra team coach mapa inyak aser iba mapang parnoki 1998 küm Durand Cup akok. Paisa, Salgaocar SC, Hindustan FC, aser Bengal Mumbai Club coach mapa inyakogo.

Pa nem 2017 küm Dhyan Chand Lifetime Achievement Award agütsüogo.

All India Football Federation (AIFF) tir Praful Patel-i,

"Hakim saab asüba osang angazüka temulung mepelar. Pa Indian football's golden generation nung züngsem ka liasü, shibai linük nung iba asaya nüngtugu kümdangtsüba nung tongtibang shilem agia liasü. Pai India nung football asaya atema inyaktsüba mapatem kodanga mamatsü. Ni pa mang ayimer," ta ashi.

Kasa mapang nung AIFF general secretary, Kushal Das-i, "Hakim saab mapa teti alitsü. Pa nüngtugu football asayar ka liasü, shiba putu aika nüburtem asoshi nükrangdong ka liasü. Par kinungertem den asükhu lemsateper. Pa tanüla tesunep nung anisüngzükdakjang ta sarasademtsür," ta ashi.

# Asian Youth & Junior Boxing nung Bishwamitra semi-i iogo



Bishwamitra Chongtham

**Luroi/August 22, 2021 (Agencies):** ASBC Youth and Junior Boxing Championships nung Deobarnü India nunger boxer Bishwamitra Chongtham-a (51kg) India nunger asayar asem den semifinals-i iogo. Iba asayamung ya tang Dubai nung asayadar.

Bishwamitra ya World Youth Championships bronze medalist lir aser pai Kazakhstan nunger asayar Kenzhe Muratul 5-0 agi koka semifinal-i iogo.

Abhimanyu Laura (92kg), Deepak (75kg) aser Preeti (57kg) nungera semifinal-i iogo. Middleweight quarterfinal nung Deepak-i Iraq nunger asayar

Dhurgham Karim tsükdaktsü. Tasembuba round nung pai Karim dak aiben tsüngshiba sülen referee-i asaya anendaktsü.

Kasa mapang nung National champion Abhimanyu-ia Kyrgyzstan nunger asayar Tenibekov Sanjar ayong ayonga koka semifinal-i iogo. Tetsür asaya nung Preeti-i Mongolia tsür Tugsjargal Nomin koka semifinal tongtetogo.

Deobarnü asaya nung India nunger rongnungi Aditya Janghu-i (86kg) dang tamakok angu. Pa Kazakhstan nunger asayar Temrlan Mukatayev-i quarterfinal nung tsükdaktsü. Asayamung tenzüker

tasembuba anogo nung India nunger trok asayaba angutsü. Asayatem rongnung Krish Pal (46kg), Ashish (54kg), Anshul (57kg), Preet Malik (63kg) aser Bharat Joon (81+kg) nunger quarterfinals asayatsü aser Gaurav Saini (70kg) semifinal asayatsü.

Iba asayamung nung youth age group nung takok angurtem nem senpet USD 6000 agütsütsü aser silver aser bronze medal angurtem nem USD 3000 aser 1500 agütsütsü. Ajisiüaka junior champions nem USD 4000 aser silver aser bronze medal angurtem nem USD 2000 aser 1000 dang agütsütsü.

# Paralympics ayongertemi temzüng ozüng akangshir

**Luroi/August 22, 2021 (Agencies):** Tokyo Paralympics ayongertemi Deobarnü ashiba agi, parnoki tashidak dak sendakba nung temzüng ozüngtem akangshidar, kong tashidak tendangba aser senzügenpong nung tenokdangba agütsüba densema lir. Paralympics tenzüksü anogo ka ana dang anunga lia Japan nung tashidak menar aika kümdar.

Wara poktetba ajanga küm ka thinenba sülen iba asayamung ya Mongolbarnü tenzüksü aser Olympics August 8 nü takok nung tembangba sülen asayamung ayongertemi iba ya inyakyim mapa küma benoka inyaktetba kuli ta shiogo.

Olympic ayongertemi July 1 nü nungi tenzüka asayamung dak sendaka alir nisung 547 dak tashidak potetba sangdongogo, saka Paralympics nung shilem agitsüpur nisung 131 dakbo tashidak potetatokogo, aser kasa mapang nung Japan nunga anogo nung nisung 25,000 tema dak tashidak poteter aser Tokyo densema tesem aika nung emergency benoka lir.

Paralympics nung shilem agirtema Olympics nung ama tazüokba balala kübok

inyaksangshir, kong mask asemtsüba, anogoshi tashidak tendangba aser senzügenpong nung tenokdangba agütsür aliba densema lir.

Ajisiüaka Tokyo 2020 CEO Toshiro Muto-i Deobarnü ashiba agi, kümdangshia alitsüji kanga tongtibang.

Jenjang tasen agishiba kübok Paralympic Village nung Japan nunger staff tem anogoshia tashidak tendangtsü, koba anogo pezü nung khen tendanga liasü.

Tetuyuba ka ajanga shilem agitsüpur kar public transport nung senzütsü aser anogo 14 sülen sadem sadema senzütsü temelaba agütsür aliba ya agintsü.

Paralympics dak sendaka alir tashidak poteter alirtem ya timba Japan nunger Games staff aser contractor tem lir. Ajisiüaka asayar pezü aser osangbener 10 daka tashidak potetogo.

Tanga linük den medemdangra Japan nung tashidak menartem ya kanga ishika dang aser tang tashi nung nisung 15,500 süogo.

Ajisiüaka linük nung vaccine menorang agütsü aser ketdangsurtem tang vaccine agütsütsü asoshi aritepba mapang lir.

# BCCI-i NCA nung coach mapa atema tejangrartem jaoker

**Mumbai, Luroi/August 22 (Agencies):** Covid wara poktetba sülen küm ka dak tema lir BCCI-i National Cricket Academy (NCA) nung coach 11 indang contract yanglushitsütsü telemtetba agiogo. Coach tem rongnung taoba mapang India team nungi asayar Ramesh Powar, SS Das, Hrishikesh Kanitkar, Subroto Banerjee aser Sujith Somsundar nunger densema lir.

National Cricket Academy (NCA) nung 'Head of Cricket' mapa atema apply asütsü asoshi tatembangbuba anogo August 31 tashi atsülangtsüba sülen BCCI-i parnok indang website nung NCA nung batting, bowling (fast & spin bowling), fielding coaches aser 'Head of Cricket Education' mapa atema tejangrartem jaokogo

Tanga coach mapa atema application tem September 10 nü tashi nung benoktettsü. Iba ajanga covid ajanga inyaksangshi mesüteti aruba sülen NCA inyakyim asendenshir tenzüksüba sayur. NCA nung tawa cricket coach tem atema level 2 hybric course' ka ayongzüka agiogo, kong taoba mapang India team

nungi asayar Irfan aser Yusuf Pathan, -India opener aser selector Devang Gandhi, Abhishek Nayar, Ashok Dinda, Jammu & Kashmir all-rounder Parveez Rasool aser Naman Ojha nungeria shilem agia liasü.

Anogo ti onsite course agiba sülen Irfan Pathan-i Crictracker dang ashiba agi, Indian cricket atema taoba India captain Dravid-i NCA nung Head Coach mapa agizükba ya tajangzüki tulu lir.

NCA nung Head of Cricket mapa atema Dravid kijai apply süa lir. Iba ajanga pai November ita T20 World Cup sülen senior national team head coach asütsü atema Ravi Shastri melentsü akok ta bilema aruba jangjashitsüogo.

NCA nung mapatem atema arishi küm tatakzükji küm 60 asütsü.

Kanitkar aser Shiv Sundar Das na NCA nung batting coach liasü aser kasa mapang nung Powar (spin) aser Banerjee (pace) bowling coach liasü. Somsundar ya tang 'Head of cricket Education' lir. Powar India tetsür team head coach aser Das batting coach kümogo.

## BILEMDANGANG

"Tamakok angutsü tsüburu takok mongutettsü."